

ANAITASUNA

283. zenb.

1974.eko urriaren 15ekoa

Pelota, 4 - 1.º - Bilbao-5
Tel. 23 74 49 - Apart. 495

SINODUA-1974



Nola eman gaurko munduari betiko Ebangelioa?

Irailaren 27an bildu du Erroman Eliza Katolikoak, urriaren azkenekoa iraungo duen bere Sinodua. Mendebaldeko erromatar Elizaren barnean, Sinodua gobernagailu berria edo berritua da, eta konstituzio berrikuntzarako asmatua. Vatikanoko II.aren ondoren hasi da lan egiten. Zazpi urtetako bitzta bakarrik du, beraz.

Oraingo hau, Sinoduaren laugarren bilkura da. Lehen bileran 1967.ean egin zen; eta orduko gaiak, fedearen krisia, eliz zuzenbidearen berritzatzea, apezgaitegiak eta liturgiaren erreforma izan ziren. 1969.eko bileran biltzarre berezia izan zen, eta gaiak: apezpikuen elkarkidetasuna eta hauek Erromarekin ukan ditzaketen harremanak. 1971.eko bilkuran, gizarte lanari zuzenagoan begiratu zitzaion, «apezaren ministertgoa eta justizia munduan» gaia aztertuz. Aurtengo bilkurarako hautatu den gaia, «gaurko munduaren ebangelio gintza» da.

Aurtengo Sinoduan parte hartzen dutenak

Erregelamenduaren arabera, mundu osoko apezpikuek osatzen dute Sinodua. Ekialdeko eliza ortodoxo-katolikoek 15 ordezkari dituzte. Gainerakoak latin elizaren ordezkariak dira —143 orotara—, munduko bost alderdietatik etorriak: Europarrak 40, Hego Amerikarrak 36, Afrikarrak 33, Asiarrak 22, Ipar Amerikarrak 7, eta Australiarrak 5. Aita Sainduak berak izendatu dituen 22 batzarkideak, eta Kuriak eta Erligioso Ordenen ordezkari bezala hautatu direnak kontutan harturik, 209 lagun dira, guztitara, Sinoduan parte hartzen dutenak. Ikusten da, beraz, Erromatarren egitekoa eta eragina, handia izanik ere, oso mugatua gerta litekeela Sinodu barnean.





Aurrera, irakurle eta ikasle!

Hemen gaituzue berriz ere EUSKALDUNTZEN metodoarekin, guztioi aukera emanez, geure hizkuntza nola ikas, zabal eta irakats jakin dezazuen.

Liburu hauetan arras ongi azaltzen dira hitzak eta esaldiak. Ikasleak, gehienik, gauza ezagunak aurkituko ditu, baina poliki poliki joko du zailago diren gauzetara. Honetaz gainera, hiru liburuotan, irudiak, eskemak eta esaera zaharrak agertzen dira.

Hiztegiaren klasifikatze bat ere egin dugu. Hitz batzuk besteak baino garrantzitsuagoak direlarik, kontutan hartu dugu haien **noiztasun** eta **maiztasuna**.

Ba dituzte liburuok elkar hizketa eta istorioak ere. Hizkuntzak eguneroko tresna bat izan behar duenez gero, haren zerbitzua agerian jartzeko jarri ditugu istorio eta elkar hizketok.

Geure hizkuntza ikasteko, hemen duzue prest, hiru mailatan, EUSKALDUNTZEN metodoa. Eska ezazue helbide honetara:

EUSKALDUNTZEN

Euskaltzaindia (Academia de la Lengua Vasca)
Ribera, 6
Bilbao-5



HAMABOSTEROKOA

JABEA:

San Frantziskoren Hirugarren Ordenako Biltzarre Nagusia.
 Batzarburu: Miguel Zapata (Goya, 25. Madrid-1)

ZUZENDARIA:

Joseba Intxausti, O.F.M.

HELBIDEA:

Bulegoa: Pelota, 4-1.º Bilbao-5
 Posta kaxa: 495

INPRIMATZAILE:

Imprenta AMADO - Mazarredo, 35. Bilbao-10
 D. L.: BI-1.753 - 1967

Sinodu honen egitekoak

Egia esan, orain arteko Sinoduek ez dute eman, askok nahiko zuketena fruiturik. Beharbada, oso teorikoak izanik, ekintzabide jakinik eragin ez dutelako. Alde anitzetatik beren buruak kristau fededuntzat jotzen dituzten zenbaitentzat, aurtengo Sinodua eraginkorragoa izanen da.

Dena dela, egitekoaren funtsean dagoen galdera bati erantzun beharko dio aurtengo batzarreak: nola eman gaurko munduari betiko Ebangelioa? Bilaketa honen lehen oinharri bezala, galde bilduma* bat zabaldu zuen Sinoduaren Sekretaritzak. Mundu osotik jasotako erantzun eta albisteekin dokumentu sozio-pastoral bat moldatu da.

Sinoduaren lehenbiziko bi asteetan, estudio horren azterketa bat egin du biltzarreak. Brasilgo Lorscheider apezpikuak azalpen orokor bat egin ondoren, bost txostenetan* erakutsi da Elizaren kontinente bakoitzeko egoera: Afrikakoa, Tanzaniako Sangok; Hego Amerikakoa, Argentinako Pironiok; Ipar Amerika eta Ozeanikoa, Estatu Batuetako Bernardin apezpikuak; Asiakoa, Pakistango Cordeirok; Europakoa, Marseillako Etxegarrik.

Esan bezala, Sinoduaren erabakiek eliz konstituzioa moldatuko dutenez, biziki garrantzizkoa izan da hainbeste eta hain partaide desberdinak elkartzea.

Lehen parteko azterketa sozio-pastoralaren ondotik, hurrengo bi asteetan ekintza berriari teologi oinharriak emango zaizkio, hau da, gaurko munduan lan egiteko premiazkoak diren zimentarri teorikoak bilatuko.

Bistan da, Vatikona II.az geroztik, Elizak gorabehera oso desberdinak ukan dituela: atzerakada nabarmenak zenbaitetan, loraldi berriak bestetan. Etorkizunaz hitz egin eta ausartu beharra dago, beraz.

Zer itxaron litekeen eliz biltzarre honetatik

Toki askotan ez du Sinoduak baikortasun* handirik aurkitu, aurretik egin direnetatik ondorio eragile eta bizkorrik sortu ez delako, nonbait. Hauxe da egia. Katoliko ekintzaileengan ere ba da pesimismorik franko. Hala ere, zerbait jatorrik espero ote genezake oraingo bilkura honetatik?

Katolikoak zerbait itxaron* beharrean daude une honetan, eta beharbada itxaropen hobeagorik ukateko arrazoinak ere ez dira falta. Hasteko, gogora dezagun, Sinoduak egingo dituen gogoetek,* bestetan baino oinharri errealistagoa dutela. Teoria hutsean funtsatu* partez,* azterketa soziologiko batetik ekiten* zaio lanari. Alde honetatik, Kontzilio berritzaile haren jite* berriari leial zaio Sinodua.

Bestalde, mundu osoari Erromako hiritik epaia eman orde, nonnahiko kristatu bizipen eta etsimenduen esperientzia dutenak mintzatuko dira oraingoan. Hauxe da, hain zuzen, Elizako gobernagailuen artean Sinoduak ekar dezakeen egiteko apartekoa: Elizaren, osoaren eta iriaren, egiazko oihartzun* eragailea izatea. Izan ere, herrien kulturek ez dizkiote alferrik ematen hain ñabardura* desberdinak: tokian tokikoa izan beharra du, beraz, eliz lagunarteak. Azken mende t'erdian (eta lehenagotik ere) Eliza Katolikoan nagusi izan diren zenbait konstituzio molde, birpentsatzekoak dira, eta horretarakoxe ere bidelagun egokia izan daiteke Sinodua.

Joanes GOIA